

Fedanschleiß'n

Kam is de Resi aus da Schui,
wird d'Muida scho nerves:
„Des Mensch, des braucht a Heiratsguit!
So wor's, so is's, so g'hert si des.“
Voheirat't nämli is da Mensch
togaus, togee. Und a
bei da Finsta in da Nocht,
is's schee und lusti a.

D'rum braucht, wer on de Ehe denkt,
ois erschtas 'wos fir's Bett:
Zwoa Tuchat'n, mit Fedan g'füt,
des gibt a schee's Duett.
Und vier Poistan, zwoa fir 'niad'n,
denn is is Bett komplett.

Weg'n dem hoit d'Muida a poor Gäns' –
net nur ois Festtogsbroten.
De Fedan nimmt fir's Bett ma her,
des hobt's eh scho darot'n.
Do jede Feda hot an Kü,
und d'rauf erscht sitz'n d'Flama.
Fir des hob'm's z'Plott an Wintabrau':
„Fedanschleiß'n tama! “

Do kemman aus da Nachborschafft
de Weiwa olle gern,
weu do gibt's oiweu an Dischkur
und Neüigkeit'n z'her'n.
Nebstbei zupfan's d'Flama o,
leg'n's häuföweis' om Tisch.
Virsihti owa pass'n's auf,
dass jo koa Luftzu is.

A scheen'a Haufa liegt scho do.
Se s'schleiß'n, zupfan – und plausch'n a.
Do froggt gonz unscheniert de Tant':
„Host Resi, du, an Frend scho a?“
Is Mensch wird paradeisarot,
stottat: „I net! A geh! “,
springt gach auf und wü davo.
D'Muida schreit: „Bleib steh!

De Fedan floig'n uns jo davo!
Du brauchst a net daschrecka,
host no koan Frend, i wisst's jo,
d'rum muisst die net vostecka!“

Rot setzt si d'Resi wieda hi.
D'rauf knauat leise d'Kuchltir,
an Spotza eena schmeißt a Hond,
de kimmt bekonnt da Resi vir.

Da Spotza floigt durch d'Kuch'l.
Volla Ongst er schreit und flottat,
und olle Weiwa springa auf:
„De Fedan wer'n scho roglat!“
Se topp'n noch'n Spotza hi:
„Fong' ma'n!“, „Passt's auf!“ „Wos tama?“
Do is's Malher a scho possiert:
In da Kuchl drin' schneib't's Flama.

Wia da Vog'l g'fongt is g'west
und ausse expediert,
hob'm's Flama g'sommöt stund'nlong,
om Fuißod'n san's gor 'kniat.
Nimma do wor 's Mensch, de Resi:
Daweu de ona'n d'Flama g'lese'n,
hot si de Remassuri g'nutzt
und si vodrukt – ihr wor's oa Wes'n.

Und koane vo de Schleissarina
hot no da junga Resi g'froggt.
De is im Otta drausst'n g'stand'n,
koit wor's – si hot si net bekloggt.
Da Spotza-Sepp, der hot scho g'wort't:
D'Res' wamt a iatzt und buss'lt's fest.
Der Gspoaß hot oi' zwoa lusti g'mocht –
daspor' ma uns den Rest.

November 2019